



李詩選題辭



南豐曾子固曰李白字太白蜀郡人遊江淮娶  
雲夢許氏去之齊魯入吳至長安明皇召為翰  
林供奉不合去北抵趙魏燕晉西涉岐邠歷商  
於至洛陽遊梁最久復之齊魯南遊淮泗再入  
吳轉金陵上秋浦潯陽卧廬山永王璘以僞命  
逼致之璘敗白奔宿松坐繫潯陽獄宣撫崔渙  
與御史宋若思驗治謂其罪薄薦其才不報先

是白嘗識郭子儀於未遇時子儀請解官贖白  
罪乃長流夜郎遂泛洞庭上峽江至巫山以赦  
得釋復如潯陽族人陽冰為當塗令白過之以  
病卒年六十四成都古今記云李白生於彰明  
縣之青蓮鄉而劉全白李翰林墓碣記以為廣  
漢人蓋唐代彰明屬廣漢故獨舉郡稱云載考  
公之自叙上裴長史書曰白少長江漢見鄉人  
相如大誇雲夢之事云楚有七澤遂來觀焉又

與逸人東巖子隱於岷山之陽巢居數年不跡  
城市廣漢太守聞而異之因舉二人有道並不  
起今按東巖子梓州鹽亭人趙旻字雲卿岷山  
之陽則指匡山杜子美贈詩所謂匡山讀書處  
其說見晏公類要鄭谷詩所謂雪下文君沽酒  
市雲巖李白讀書山者也廣漢太守則蘇頲也  
頲薦疏云趙旻術數李白文章即其事也公後  
在淮南寄趙徵君詩云國門遙天外鄉路遠山

隔朝憶相如臺夕夢子雲宅可證矣五代劉昫  
脩唐書以白為山東人自元稹序杜詩而誤杜  
詩云汝與山東李白好樂史云李白慕謝安風  
流自號東山李白杜子美所云乃是東山後人  
倒讀為山東元稹之序又由於倒讀杜詩也不  
然則太白之詩云學劍來山東又云我家寄東  
魯豈自誣乎宋有晁公武者孟浪人也遂信舊  
唐書及元稹之誤乃曰太白自叙及詩皆不足

信噫世安有己之族姓己自迷之而傍取他證  
乎新唐書知其誤乃更之為唐宗室蓋以隴西  
郡望為標也善乎劉子玄之言曰作史者為人  
立傳皆取舊號施之於今為王氏傳必曰瑯琊  
臨沂人為李氏傳必曰隴西成紀人欲求實錄  
不亦難乎且人無定所因地而生生於荆者言  
皆成楚生於晉者齒便成黃豈有世歷百年人  
更七葉而猶以本國為是此鄉為非則是孔子

里於昌平陰氏家於新野而系纂微子源承管仲乃爲齊宋之人非曰鄒魯之士可乎宋景文脩唐書其弊正坐此夫族姓郡國關係亦大矣誦其詩不知其人可乎余故詳著而明辨之以訂史氏之誤姓譜之缺焉若夫公之詩歌泣鬼神而冠今古奚容喙哉吾友禺山張子愈光自童習至白紛與走共爲詩者嘗謂余曰李杜齊名杜公全集外節抄選本凡數十家而李何獨無之乃取公集中膾炙人口者一百六十餘首刻之明詩亭屬慎題辭其端云  
嘉靖乙巳孟秋朔日成都楊慎書

李詩選目錄

卷一

古風

遠別離

公無渡河

蜀道難

梁甫吟

烏夜啼

烏棲曲

將進酒

天馬歌

長相思

前有樽酒行

夷則格上白鳩拂舞辭

胡無人

野田黃雀行

隨園張氏  
勳輝家藏

卷二

獨漉篇

登高丘而望遠海

陽春歌

揚叛兒

荊州歌

久別離

白頭吟

司馬將軍歌

長干行

白紵辭

鳳笙篇

玉階怨

卷三

襄陽曲

大堤曲

宮中行樂詞

清平調詞

洛陽陌

陌上桑

相逢行

折楊柳

白鼻騮

靜夜思

綠水曲

春思

擣衣篇

長相思

卷四

襄陽歌

江上吟

扶風豪士歌

梁園吟

鳴皋歌送岑徵君

卷五

金陵歌送別范宣

白雲歌送別劉十六歸山

當塗趙炎少府粉圖山水歌 峨眉山月歌

峨眉山月歌送蜀僧宴入中京

卷五

贈孟浩然 贈郭將軍

口號贈徵君鴻

經亂後天恩流夜郎憶舊遊書懷贈江夏

韋太守良宰

江上贈竇長史

贈漢陽輔錄事

經亂後將避地剡中畱贈崔宣城

卷六

安陸白兆山桃花嶺寄劉侍御綰

淮南卧病書懷寄蜀中趙徵君蕤

春日獨坐寄鄭明府 寄淮南故人

沙丘城下寄杜甫

聞王昌齡左遷龍標遙有此寄



太白詩選目  
三  
憶舊遊寄譙郡元參軍

夜月江行寄崔員外宗之

新林浦阻風寄友人

禪房懷友人岑倫

廬山謠寄侍御虛舟 寄王漢陽

春日歸山寄孟浩然 江上寄元六林宗

涇溪東郡寄鄭少府諤

三山望金陵寄殷淑

秋日魯郡堯祠亭上宴別杜補闕范侍御

別中都明府兄 夢遊天姥吟畱別

金陵酒肆畱別 別東林寺僧

黃鶴樓送孟浩然之廣陵

渡荊門送別

卷七

南陽送客

送王屋山人魏南還王屋

送友人尋越中山水

魯郡堯祠送竇明府薄華還西京

單父東樓秋夜送族弟沈之秦

魯郡東石門送杜二甫 灞陵行送別

送賀監歸四明應制 送羽林陶將軍

送程劉二侍郎兼獨孤判官越安西幕府

送賀賓客歸越

同王昌齡送族弟襄歸桂陽

送外甥鄭灌從軍

送祝八之江東賦得浣沙石

金陵送張十一再遊東吳

送蕭三十一之魯中兼問稚子伯禽

送楊山人歸嵩山 送殷叔三首

送陸判官往琵琶峽

宣城謝朓樓餞別校書叔雲

杭州送裴大澤

卷八

訓宇文少府見贈桃竹書筒

訓張司馬贈墨

答湖州迦葉司馬問白是何人

訓崔十五見招

東魯門泛舟

携妓登梁王棲霞山孟氏桃園中

侍從遊宿溫泉宮作

陪侍郎叔遊洞庭醉後三首

陪族叔刑部侍郎曄及中書賈舍人至遊

洞庭五首 登覽

登新平樓

卷九

下途歸石門舊居

客中行

太原早秋

上三峽

早發白帝城

秋下荆門

宿五松山下荀娼家

蘇臺覽古

陪宋中丞武昌夜飲懷古

宿巫山下

謝公亭

魯中都東樓醉起作

夜泊牛渚懷古

清溪半夜聞笛

卷十

擬古

勞勞亭

題江夏脩靜寺

題宛溪館

觀胡人吹笛

宣城見杜鵑花

三五七言

哭宣城善釀紀叟

李詩選目錄

李詩選卷一

永昌張含愈光精選

成都楊慎用脩批點

古風

古風

秦皇掃六合虎視何雄哉飛劍決浮雲諸侯盡  
西來明斷自天啓大略駕群才收兵鑄金人函  
谷正東開銘功會稽嶺騁望瑯琊臺刑徒七十

萬起土驪山隈

蔡質漢儀曰丞相斯昧死言臣所將隸徒七十二萬人治驪山

者已深已極鑿之不入燒之不然叩之空空如下天狀制曰鑿之不入燒之不然其旁行三百

丈乃尚採不死藥茫然使心哀連弩射海魚長

鯨正崔嵬額鼻象五嶽揚波噴雲雷鬚鬣殺青

天何由覩蓬萊徐市載秦女樓船幾時迴但見

三泉下金棺葬寒灰

又

咸陽二三月宮柳黃金枝綠幘誰家子賣珠輕

薄兒日暮醉酒歸白馬驕且馳意氣人所仰治

遊方及時子雲不曉事晚獻長楊辭賦達身已

老草玄鬚若絲投閣良可嘆但為此輩嗤

又

莊周夢胡蝶胡蝶為莊周一體更變易萬事良

悠悠乃知蓬萊水復作清淺流青門種瓜人舊

日東陵侯富貴故如此營營何所求

又

天津三月時千門桃與李朝為斷腸花暮逐東  
 流水前水復後水古今相續流新人非舊人年  
 年橋上遊鷄鳴海色動謁帝羅公侯月落西上  
 陽西京記上陽宮西有西上陽宮餘輝半城樓  
 衣冠照雲日朝下散皇州鞍馬如飛龍黃金絡  
 馬頭行人皆辟易志氣橫高丘入門上高堂列  
 鼎錯珍羞香風引趙舞清管隨齊謳七十紫鴛  
 鴦雙雙戲庭幽行樂爭晝夜自言度千秋功成

身不退自古多愆尤黃犬空嘆息綠珠成釁雉  
 何如鴟夷子散髮棹扁舟

又

昔我遊齊都登華不注峯茲山何峻秀綵翠如  
 芙蓉蕭颯古仙人了知是赤松借予一白鹿自  
 挾兩青龍含笑凌倒景欣然願相從泣與親友  
 別欲語再三咽勗君青松心弩力保霜雪世路  
 多險艱白日欺紅顏分手各千里去去何時還

在世復幾時。倏如飄風度。空聞紫金經。白首愁  
相誤。撫已忽自笑。沉吟為誰故。名利徒煎熬。安  
得閑余步。終畱赤玉鳥。東上蓬萊路。秦帝如我  
求。蒼蒼但煙霧。

### 古樂府

#### 遠別離

遠別離。古有皇英之二女。乃在洞庭之南。瀟湘  
之浦。海水直下萬里深。誰人不言此離苦。日慘

慘兮雲冥冥。猩猩啼煙兮鬼嘯雨。我縱言之將  
何補。皇穹竊恐不照余之忠誠。雲憑憑兮欲吼  
怒。堯舜當之亦禪禹。君失臣兮龍為魚。權歸臣  
兮鼠變虎。或言堯幽囚舜野死。九疑聯縣皆相  
似。重瞳孤墳竟何是。帝子泣兮綠雲閒。隨風波  
兮去無還。慟哭兮遠望。見蒼梧之深山。蒼梧山  
崩。湘水絕。竹上之淚乃可滅。

#### 公無渡河

黃河西來決崑崙咆哮萬里觸龍門波滔天堯  
咨嗟大禹理百川兒啼不窺家殺湍湮洪水九  
州始蠶麻其害乃去茫然風沙被髮之叟狂而  
癡清晨臨流欲奚爲旁人不惜妻止之公無渡  
河苦渡之虎可搏河難馮公果溺死流海湄有  
長鯨白齒若雪山公乎公乎掛罨於其間篋篋  
所悲竟不還

蜀道難

噫吁戲危乎高哉蜀道之難難於上青天蠶叢  
及魚鳧開國何茫然爾來四萬八千歲不與秦  
塞通人煙西當太白有鳥道可以橫絕峨眉巔  
地崩山摧壯士死然後天梯石棧相鈎連上有  
六龍回日之高標下有衝波逆折之回川黃鶴  
之飛尚不得過猿猱欲度愁攀援青泥何盤盤  
百步九折縈巖巒捫參歷井仰脅息以手撫膺  
坐長嘆問君西遊何時還畏途巖巖不可攀但



見悲鳥號古木雄飛從雌繞林間又聞子規啼  
夜月悲空山蜀道之難難於上青天使人聽此  
凋朱顏連峯去天不盈尺枯松倒掛倚絕壁飛  
湍瀑流爭喧豗砢崖轉石萬壑雷其險也如此  
嗟爾遠道之人胡為乎來哉劍閣崢嶸而崔嵬  
一夫當關萬夫莫開所守或匪親化為狼與豺  
朝避猛虎夕避長蛇磨牙吮血殺人如麻錦城  
雖云樂不如早還家蜀道之難難於上青天側

身西望長咨嗟

梁甫吟

長嘯梁甫吟何時見陽春君不見朝歌屠叟舜  
棘津八十西來釣渭濱寧羞白髮照清水逢時  
吐氣思經綸廣張三千六百鈞風期暗與文王  
親大賢虎變愚不測當年頗似尋常人君不見  
高陽酒徒起草中長揖山東隆準公入門不拜  
騁雄辯兩女輟洗來趨風東下齊城七十二指

揮楚漢如旋蓬狂客落魄尚如此何況壯士當  
群雄我欲攀龍見明主雷公砰訇震天鼓帝傍  
投壺多玉女三時大笑開電光倏爍晦冥起風  
雨閭闔九門不可通以額扣關閹者怒白日不  
照吾精誠杞國無事憂天傾狹狹磨牙競人肉  
駟虞不折生草莖手接飛探搏彫虎側足焦原  
未言苦智者可卷愚者豪世人見我輕鴻毛力  
排南山三壯士齊相殺之費二桃吳楚弄兵無  
當安之

烏夜啼

劇孟亞夫哈爾為徒勞梁甫吟聲正悲張公兩  
龍劍神物合有時風雲感會起屠釣大人峴岿  
黃雲城邊烏欲棲歸飛啞啞枝上啼機中織錦  
秦川女碧紗如煙隔牕語停梭悵然憶遠人獨  
宿孤房淚如雨

烏棲曲

太白詩選卷一  
七  
姑蘇臺上烏棲時吳王宮裏醉西施吳歌楚舞  
歡未畢青山欲啣半邊日銀箭金壺漏水多起  
看秋月墜江波東方漸高柰樂何

將進酒

君不見黃河之水天上來奔流倒海不復迴君  
不見高堂明鏡悲白髮朝如青絲暮成雪人生  
得意須盡歡莫使金樽空對月天生我材必有  
用千金散盡還復來烹羊宰牛且為樂會須一

飲三百杯岑夫子丹丘生進酒君莫停與君歌  
一曲請君為我側耳聽鐘鼓饌玉不足貴但願  
長醉不願醒古來聖賢皆寂寞惟有飲者留其  
名陳王昔日宴平樂斗酒十千恣譔主人何  
為言少錢徑須沽酒對君酌五花馬千金裘呼  
兒將出換美酒與爾同銷萬古愁

天馬歌

天馬來出月氏窟背為虎文龍翼骨嘶青雲振

綠髮蘭筋權竒走滅沒騰崑崙歷西極四足無  
一蹶雞鳴刷燕哺秣越神行電邁躡恍惚天馬  
呼飛龍趨目明長庚臆雙鳧尾如流星首渴鳥  
口噴紅光汗溝珠曾陪時龍躡天衢羈金絡月  
照皇都逸氣稜稜凌九區白壁如山誰敢沽回  
頭笑紫燕但覺爾輩愚天馬奔戀君軒駉躍驚  
矯浮雲翻萬里足躑躅遙瞻閭闔門不逢寒風  
子誰採逸景孫白雲在天丘陵遠崔嵬鹽車上

峻坂倒行逆施畏日晚伯樂翦拂中道遺少盡  
其力老棄之顛逢田子方惻然為我悲雖有玉  
山永不能療苦飢嚴霜五月凋桂枝伏櫪銜冤  
摧兩眉請君贖獻穆天子猶堪弄影舞瑤池

長相思

長相思在長安絡緯秋啼金井闌微霜淒淒簾  
色寒孤燈不明思欲絕卷帷望月空長嘆美人  
如花隔雲端上有青冥之長天下有淥水之波

灩天長路遠魂飛苦夢魂不到關山難長相思  
摧心肝

前有樽酒行

春風東來忽相過金樽添酒生微波落花紛紛  
稍覺多美人欲醉朱顏酡青軒桃李能幾何流  
光欺人忽蹉跎君起舞日西夕當年意氣不肯  
平白髮如絲嘆何益

又

琴奏龍門之綠桐玉壺美酒清若空催絃拂柱  
與君飲看朱成碧顏始紅胡姬貌如花當壚笑  
春風笑春風舞羅衣君今不醉將安歸

夷則格上白鳩拂舞辭

鏗鳴鐘考朗鼓歌白鳩引拂舞白鳩之白誰與  
隣霜衣雪襟誠可珍含哺七子能平均食不噎  
性安馴首農政鳴陽春天子刻玉杖鏤形賜耆  
人白鷺之白非純真外潔其色心匪仁闕五德

無司晨胡為啄我葭下之紫鱗鷹鸛鷓鴣貪而  
好殺鳳凰雖大聖不願以為臣

胡無人

嚴風吹霜海草凋筋幹精堅胡馬驕漢家戰士  
三十萬將軍兼領霍票姚流星白羽腰間插劍  
花秋蓮光出匣天兵照雪下玉關虜箭如沙射  
金甲雲龍風虎盡交回太白八月敵可摧敵可  
摧旄頭滅拉胡之腸履胡血履胡血拉胡腸胡

無人漢道昌

野田黃雀行

遊莫逐炎洲翠棲莫近吳宮燕吳宮火起焚巢  
窠炎洲逐翠遭網羅蕭條兩翅蓬蒿下縱有鷹  
鸛奈若何

李詩選卷一

李詩選卷二

樂府

獨漉篇

獨漉水中泥水濁不見月不見月尚可水深行  
 人沒越鳥從南來胡鷹亦北渡我欲彎弓向天  
 射惜其中道失歸路落葉別樹飄零隨風客無  
 所托悲與此同羅幃舒卷似有人開明月直入  
 無心可猜雄劍掛壁時時龍鳴不斷犀象繡澁

蒼生國耻未雪何由成名神鷹夢澤不顧鴟鵂

為君一擊鵬搏九天蕭曰此詩之意謂士之用世當為國雪耻立功猶神

鷹之不顧凡鳥而但擊九天之鵬也

### 登高丘而望遠海

登高丘望遠海六鰲骨已霜三山流安在扶桑

半摧折白日沉光彩河圖絳象云邠之隘上為扶桑日所升宣陸之阻上

為吳泉月所登銀臺金闕如夢中秦皇漢武空相待精

衛費木石龜鼉無所憑君不見驪山茂陵盡灰

滅牧羊之子來攀登盜賊劫寶玉精靈竟何能

窮兵黷武今如此鼎湖飛龍安可乘

### 陽春歌

長安白日照春空綠楊結烟垂裊風披香殿前

花始紅流芳發色繡戶中繡戶中相經過飛燕

皇后輕身舞皇后言舞貶在言外紫宮夫人絕世歌聖君

三萬六千日歲歲年年奈樂何

### 楊叛兒



君歌揚叛兒。妾勸新豐酒。何許最關人。烏啼白  
門柳。烏啼隱楊花。君醉留妾家。博山爐中沉香  
火。雙煙一氣凌紫霞。升菴云古樂府暫出白門  
前楊柳可藏烏歡作沉水  
香儂作博山鑪太白此詩  
蓋衍其意而聲調愈暢

### 荊州歌

白帝城邊足風波。瞿塘五月誰敢過。荊州麥熟  
繭成蛾。繰絲憶君頭緒多。撥穀飛鳴奈妾何。升菴  
云此歌有漢謠之風。又云唐人詩可入漢魏  
樂府者惟太白此首及張文昌白鬮謠李長吉

鄴城謠三首而止杜子  
美却無一篇可入此格

### 久別離

別來幾春未還家。玉牕五見櫻桃花。升菴云起  
二句一問  
一 况有錦字書。開緘使人嗟。至此腸斷彼心絕。  
雲鬟綠鬢罷梳結。愁如回飈亂白雪。去年寄書  
報陽臺。今年寄書重相催。東風兮東風。為我吹  
行雲。使西來待來竟不來。落花寂寞委青苔。

### 白頭吟

錦水東北流波蕩雙鴛鴦雄巢漢宮樹雌弄秦  
草芳寧同萬死碎綺翼不忍雲間兩分張此時  
阿嬌正嬌妬獨坐長門愁日暮但願君恩顧妾  
深豈惜黃金買詞賦相如作賦得黃金丈夫好  
新多異心一朝將聘茂陵女文君因贈白頭吟  
東流不作西歸水落花辭條羞故林免絲固無  
情隨風任傾倒誰使女蘿枝而來強縈抱兩草  
猶一心人心不如草莫捲龍鬚席從他生網絲

且留琥珀枕或有夢來時覆水再收豈滿杯棄  
妾已去難重迴古來得意不相負祇今惟見青  
陵臺

司馬將軍歌

狂風吹古月竊弄章華臺北落明星動光彩南  
征猛將如雲雷手中雷擊倚天劍直斬長鯨海  
水開我見樓船壯心目頗似龍驤下三蜀揚兵  
習戰張虎旗江中白浪如銀屋身居玉帳臨河

魁紫髯若戟冠崔嵬細柳開營揖天子始知灞  
上為嬰孩羌笛橫吹去聲阿鞞迴向月樓中吹平聲  
落梅齊賢曰阿鞞迴亦曲名張祐集作阿濫堆將軍自起舞長劍壯  
士呼聲動九域功成獻凱見明主丹青畫像麒麟臺

長干行

妾髮初覆額折花門前劇郎騎竹馬來遶床弄  
青梅同居長千里兩小無嫌猜十四為君婦羞

顏未嘗開低頭向暗壁千喚不一迴十五始展  
眉願同塵與灰常存抱柱信豈上望夫臺十六  
君遠行瞿塘灩澦堆五月不可觸猿聲天上哀  
門前舊行跡一一生綠苔苔深不能掃落葉秋

風早八月胡蝶黃

唐文粹作黃今俗本作來非也胡蝶以春時來八月作來

時也秋蝶多黃感金氣也白樂天詩秋花紫濛濛秋蝶黃茸茸此可以証也雙飛西

園草感此傷妾心坐愁紅顏老早晚下三巴預  
將書報家相迎不道遠直至長風沙池州之鷹

里名長風沙江南謂水邊可田為沙徽州有錦沙村儀真有白沙里是也

又

憶妾深閨裏煙塵不曾識嫁與長干人沙頭候風色五月南風興思君下巴陵八月西風起想君發揚子去來悲如何見少離別多湘潭幾日到妾夢越風波昨夜狂風度吹折江頭樹森森暗無邊行人在何處址客真王公朱衣滿江中薄暮來投宿數朝不肯東

升菴曰今本無此四句以慎家藏本補之

好乘浮雲驄佳期蘭渚東鴛鴦綠蒲上翡翠錦屏中自憐十五餘顏色桃花紅那作商人婦愁水復愁風

白紵辭

月寒江清夜沉沉美人一咲千黃金垂羅舞榭揚哀音郢中白雪且莫吟子夜吳歌動君心動君心冀君賞願作天池雙鴛鴦一朝飛去青雲

上

吳刀剪彩縫舞衣明妝麗服奪春暉揚眉轉袖  
若雪飛傾城獨立世所稀激楚結風醉忘歸高  
堂月落燭已微玉釵掛纓君莫違

鳳笙篇

仙人十五愛吹笙學得崑丘彩鳳鳴始聞鍊氣  
食金液復道朝天赴玉京玉京迢迢幾千里鳳  
笙去去無窮已欲嘆離聲發絳唇更嗟別調流  
纖指此時惜別詎堪聞此地相看未忍分重吟

真曲和清吹却奏仙歌響綠雲綠雲紫氣向函  
關訪道應尋緱氏山莫學吹笙王子晉一遇浮  
丘斷不還

玉階怨

玉階生白露夜久侵羅襪却下水晶簾玲瓏望  
秋月

李詩選卷二

李詩選卷三  
樂府

襄陽曲

襄陽行樂處歌舞白銅鞮  
江城回潒水花月使人迷

又

山公醉酒時酩酊高陽下  
頭上白接籬倒着還騎馬

又

峴山臨漢江水淥沙如雪上有墮淚碑青苔久  
磨滅

大堤曲

漢水臨襄陽花開大堤暖佳期大堤下淚向南  
雲滿春風復無情吹我夢魂散不見眼中人天  
長音信斷

宮中行樂詞

柳色黃金嫩梨花白雪香玉樓巢翡翠金殿鎖  
鴛鴦選妓隨雕輦徵歌出洞房宮中誰第一飛  
燕在昭陽

又

盧橘為秦樹蒲萄出漢宮煙花宜落日絲管醉  
春風笛奏龍吟水簫鳴鳳下空君王多樂事還  
與萬方同

又

寒雪梅中盡。春風柳上歸。宮鶯嬌欲醉。簷燕語  
還飛。遲日明歌席。新花豔舞衣。晚來移綵仗。行  
樂泥光輝。

清平調詞

雲想衣裳花想容。春風拂檻露華濃。若非群玉  
山頭見。會向瑤臺月下逢。

洛陽陌

白玉誰家郎。回車渡天津。看花東陌上。驚動洛

陽人

陌上桑

美女渭橋東。春還事蠶作五馬。如飛龍。青絲結  
金絡。妾本秦羅敷。玉顏豔名都。綠條映素手。採  
桑向城隅。使君且不顧。况復論秋胡。寒將蠶愛碧  
草。鳴鳳棲青梧。託心自有處。但怪傍人愚。徒令  
白日暮。高駕空踟蹰。

相逢行



胡騎五花馬。謁帝出銀臺。秀色誰家子。雲車珠  
箔開。金鞭遙指點。玉勒近遲回。夾轂相借問。疑  
從天上來。蹙入青綺門。當歌共銜杯。銜杯映歌  
扇。似月雲中見。相見不得親。不如不相見。相見  
情已深。未語可知心。胡為守空閨。孤眠愁錦衾。  
錦衾與羅幃。纏綿會有時。春風正澹蕩。暮雨來  
何遲。願因三青鳥。更報長相思。景不待人須  
更髮。成絲當年失行樂。老去徒傷悲。持此道密

意毋令曠佳期

折楊柳

垂楊拂綠水。搖艷東風年。花明玉關雪。葉暖金  
牕煙。美人結長想。對此心淒然。攀條折春色。遠  
寄龍庭前

白鼻騮

銀鞍白鼻騮。綠池障泥錦。細雨春風花。落時揮  
鞭直就胡姬飲

靜夜思

牀前看月光疑是地上霜  
舉頭望山月低頭思故鄉

綠水曲

淶水明秋月南湖採白蘋  
荷花嬌欲語愁殺蕩舟人

春思

燕草如碧絲秦桑低綠枝  
當君懷歸日是妾斷

腸時春風不相識何事入羅幃

擣衣篇

閨裏佳人年十餘  
嚙蛾對影恨離居  
忽逢江上春歸燕  
銜得雲中尺素書  
玉手開絨長嘆息  
狂夫猶戍交河北  
萬里交河水北流  
願為雙燕泛中洲  
君邊雲擁青絲騎  
妾處苔生紅粉樓  
樓上春風日將歇  
誰能攬鏡看愁髮  
曉吹簫管隨落花  
夜擣戎衣向明月  
明月高高刺漏長  
真珠簾

箔掩蘭堂橫垂寶幄同心結半拂瓊筵蘇合香  
瓊筵寶幄連枝錦燈燭熒熒照孤寢有便馮將  
金剪刀為君留下相思枕摘盡庭蘭不見君紅  
巾拭淚生氤氳明年若更征邊塞願作陽臺一  
段雲

長相思

日色欲盡花含煙月明欲素愁不眠趙瑟初停  
鳳凰柱蜀琴欲奏鴛鴦絃此曲有意無人傳願  
隨春風寄燕然憶君迢迢隔青天昔時橫波目  
今作流淚泉不信妾腸斷歸來看取明鏡前

李詩選卷三

李詩選卷四

歌吟

襄陽歌

落日欲沒峴山西倒着接籬花下迷襄陽小兒  
齊拍手攔街爭唱白銅鞮傍人借問笑何事笑  
殺山翁醉似泥鷓鴣杓鸚鵡杯百年三萬六千  
日一日須傾三百杯遙看漢水鴨頭綠恰似蒲  
萄初醖醅此江若變作春酒壘麴便築糟丘臺

千金駿馬換小妾笑坐雕鞍歌落梅車傍側掛  
一壺酒鳳笙龍管行相催咸陽市中嘆黃犬何  
如月下傾金罍君不見晉朝羊公一片石龜頭  
剝落生莓苔淚亦不能爲之墮心亦不能爲之  
哀清風朗月不用一錢買玉山自倒非人推舒  
州杓力士鎗李白與爾同死生襄王雲雨今安  
在江水東流猿夜聲

江上吟

木蘭之枻沙棠舟玉簫金管坐兩頭美酒樽中  
置千斛載妓隨波任去留仙人有待乘黃鶴海  
客無心隨白鷗屈平詞賦懸日月楚王臺榭空  
山丘興酣落筆搖五嶽詩成笑傲凌滄洲功名  
富貴若長在漢水亦應西北流

扶風豪士歌

洛陽三月飛胡沙洛陽城中人怨嗟天津流水  
波赤血白骨相撐如亂麻我亦東奔向吳國浮

雲四塞道路賒東方日出啼早鴉城門人開掃  
落花梧桐楊柳拂金井來醉扶風豪士家扶風  
豪士天下竒意氣相傾山可移作人不倚將軍  
勢飲酒豈顧尚書期雕盤綺食會衆客吳歌趙  
舞香風吹原嘗春陵六國時開心寫意君所知  
堂中各有三千士明日報恩知是誰撫長劍一  
揚眉清水白石何離離脫吾帽向君笑飲君酒  
為君吟張良未逐赤松去橋邊黃石知我心

梁園吟

我浮黃雲去京關挂席欲進波連山天長水濶  
厭遠涉訪古始及平臺間平臺為客憂思多對  
酒遂作梁園歌却憶蓬池阮公詠因吟淶水揚  
洪波洪波浩蕩迷舊國路遠西歸安可得人生  
達命豈暇愁且飲美酒登高樓平頭奴子搖大  
扇五月不熱疑清秋玉盤楊梅為君設吳鹽如  
花皎白雪持鹽把酒但飲之莫學夷齊事高潔

昔人豪貴信陵君。今人耕種信陵墳。荒城虛照  
碧山月。古木盡入蒼梧雲。梁王宮闕今安在。枚  
馬先歸不相待。舞影歌聲散渌池。空餘汴水東  
流海。沉吟此事淚滿衣。黃金買醉未能歸。連呼  
五白行六博。分曹賭酒酣。輝歌且謠意方遠。  
東山高卧時起來。欲濟蒼生未應晚。

鳴臯歌送岑徵君

昔有人兮思鳴臯。阻積雪兮心煩勞。洪河凌競

不可以徑度。冰龍鱗兮難容舸。邀仙山之峻極  
兮。聞天籟之嘈嘈。霜崖縞皓以合沓兮。若長風  
扇海湧滄溟之波濤。玄猿綠罷。絳燄崑崙危柯。  
振石駭膽。慄魄群呼。而相號峯嶂。嶒嶒以路絕。挂  
星辰於巖。敷送君之歸兮。動鳴臯之新作。交鼓  
吹兮。彈絲觴。清冷之池閣。君不見兮。何待若反  
顧之。黃鶴掃梁園之羣英。振大雅於東洛巾。征  
軒兮。歷阻折。尋幽居兮。越嶺嶸。寧盤白石兮。坐素

月琴松風兮寂萬壑望不見兮心氛氳蘿冥冥  
兮霰紛紛水橫洞以下淥波小聲而上聞虎嘯  
谷而生風龍藏溪而吐雲寡鶴清淚飢鼯嘖呻  
魂獨處此幽默兮愀空山而愁人雞聚族以爭  
食鳳孤飛而無隣蝮蛇嘲龍魚目混珍媼母衣  
錦西施負薪若使巢由桎梏於軒冕兮亦奚異  
乎夔龍蹶躅於風塵哭何苦而救楚笑何誇而  
却秦吾誠不能學二子沽名矯節以耀世兮固

將棄天地而遺身白鷗兮飛來長與君兮相親

橫江詞

楊慎曰太白橫江詞六首章雖分  
局意如貫珠俗本以第一首編入

長短句後五首編入七言絕句首  
尾衡决殊失作者之意如杜詩秋  
興八首亦分作二處余特正之凡  
古人詩歌不可分類以此

人道橫江好儂道橫江惡一風三日吹倒山白  
浪高於瓦官閣

瓦官閣晉武時建以陶官地在  
秦淮址故名瓦官訛而為棺

其二

海潮南去過潯陽牛渚由來險馬當橫江欲渡



風波惡。一水牽愁萬里長。

其三

橫江西望阻西秦。漢水東連揚子津。白浪如山  
那能渡。狂風愁殺峭帆人。

其四

海神來過惡風迴。浪打天門石壁開。浙江八月  
何如此。濤似連山噴雪來。

其五

橫江館前津吏迎。向余東指海雲生。郎今欲渡  
緣何事。如此風波不可行。梁元帝詩郎今欲渡  
畏風波

其六

月暈天風霧不開。海鯨東蹙百川迴。驚波一起  
三山動。公無渡河歸去來。

金陵歌送別范宣

石頭巉巖如虎踞。凌波欲過滄江去。鍾山龍盤  
走勢來。秀色橫分歷陽樹。四十餘帝三百秋。功

名事跡隨東流白馬小兒誰家子泰清之歲來  
關囚金陵昔時何壯哉席卷英豪天下來冠蓋  
散為煙霧盡金輿玉座成寒灰扣劍悲吟空咄  
嗟梁陳白骨亂如麻天子龍沉景陽井誰歌玉  
樹後庭花此地傷心不能道目下離離長春草  
送爾長江萬里心他年來訪南山老

白雲歌送劉十六歸山

楚山秦山皆白雲白雲處處長隨君長隨君君

入楚山裏雲亦隨君渡湘水湘水上女蘿衣白  
雲堪卧君早歸

當塗趙炎少府粉圖山水歌

峨眉高出西極天羅浮直與南溟連名公繹思  
揮彩筆驅山走海置眼前滿堂空翠如可掃赤  
城霞氣蒼梧煙洞庭瀟湘意渺綿三江七澤情  
洄洄驚濤洶湧向何處孤舟一去迷歸年征帆  
不動亦不旋飄如隨風落天邊心搖目斷興難

盡幾時可到三山巔西峰崢嶸噴流泉橫石蹙  
水波潺湲東厓合沓蔽輕霧深林雜樹空芊綿  
此中冥昧失晝夜隱几寂聽無鳴蟬長松之下  
列羽客對坐不語南昌僊南昌僊人趙夫子妙  
年歷落青雲士訟庭無事羅衆賓杳然如在丹  
青裏五色粉圖安足珍真僊可以全吾身若待  
功成拂衣去武陵桃花笑殺人

峨眉山月歌

峨眉山月半輪秋影入平羌江水流夜發清溪  
向三峽思君不見下渝州

峨眉山月歌送蜀僧晏入中京

我在巴東三峽時西看明月憶峨眉月出峨眉  
照滄海與人萬里長相隨黃鶴樓前月華白此  
中忽見峨眉山客峨眉山月還送君風吹西到長  
安陌長安大道橫九天峨眉山月照秦川黃金  
獅子乘高座白玉麈尾談重玄我似浮雲滯吳

越君逢聖主遊丹闕一振高名滿帝都歸時還  
弄峨眉月

李詩選卷四

李詩選卷五

贈

贈孟浩然

吾愛孟夫子風流天下聞紅顏棄軒冕白首卧  
松雲醉月頻中聖迷花不事君高山安可仰徒  
此揖清芬

贈郭將軍

俗本首句作將軍豪蕩有英威  
乃妄人亂改者當以古本為正

將軍少年出武威入掌銀臺護紫微平明拂劍

朝天去薄暮垂鞭信馬歸愛子臨風吹玉笛美人向月舞羅衣疇昔豪雄如夢裏相逢且欲醉春暉

口號贈徵君鴻

陶令辭彭澤梁鴻入會稽我尋高士傳君與古人齊雲臥雷丹壑天書降紫泥不知楊伯起早晚向關西

經亂離後天恩流夜郎憶舊遊書懷贈江

夏韋太守良宰

天上白玉京十二樓五城仙人撫我頂結髮受長生誤逐世間樂頗窮理亂情九十六聖君浮雲挂空名天地賭一擲未能忘戰爭試涉霸王畧將期軒冕榮時命乃大謬棄之海上行學劍翻自哂為文竟何成劍非萬人敵文竊四海聲兒戲不足道五噫出西京臨當欲去時慷慨泪沾纓嘆君個儻才標舉冠群英開筵引祖帳慰

此遠徂征鞍馬若浮雲送余驃騎亭歌鐘不盡  
意白日落昆明十月到幽州戈鋌若羅星君王  
棄北海掃地借長鯨呼吸走百川燕然可摧傾  
心知不得語却欲棲蓬瀛彎弧懼天狼挾矢不  
敢張攬涕黃金臺呼天哭昭王無人貴駿骨駮  
耳空騰驥樂毅儻再生于今亦奔亡蹉跎不得  
意驅馬還貴鄉逢君聽絃歌肅穆坐華堂百里  
獨太古陶然卧羲皇徵樂昌樂館開筵列壺觴

賢豪間青娥對燭儼成行醉舞紛綺席清歌繞  
飛梁歡娛未終朝秩滿歸咸陽祖道擁萬人供  
帳遙相望一別隔千里榮枯異炎涼炎涼幾度  
改九土中橫潰漢甲連胡兵沙塵暗雲海草木  
搖殺氣星辰無光彩白骨成丘山蒼生竟何罪  
幽關壯帝居國命懸哥舒長戟三十萬開門納  
堯渠公鄉如犬羊忠謹醢與菹二聖出遊豫兩  
京遂丘墟帝子許專征秉旄控強楚節制非桓

文軍師擁熊虎人心失去就賊勢騰風雨惟君  
固房陵誠節冠終古卧僕香鑪頂冷霞嗽瑤泉  
門開九江轉枕下五湖連半夜水軍來潯陽滿  
旌旃空名適自誤迫脅上樓船徒賜五百金棄  
之若浮煙辭官不受賞翻謫夜郎天夜郎萬里  
道西上令人老掃蕩六合清仍為負霜草日月  
無偏照何由訴蒼昊良牧稱神明深仁恤交道  
一忝青雲客三登黃鶴樓顧慚禰處士虛對鸚

鵠洲樊山霸氣盡寥落天地秋江帶峨眉雪川  
橫三峽流萬舸此中來連帆過揚州送此萬里

目曠然散我愁紗幮倚天開水樹綠如髮

林邑記曰

播移樹柯節發根下垂窺日畏街山促酒喜得

虛中森羅望之似懸髮

月吳娃與越豔窈窕誇鉛紅呼來上雲梯含笑  
出簾櫳對客小垂手羅衣舞春風賓跪請休息  
主人情愈極覽君荆山作江鮑堪動色清水出  
芙蓉天然去雕飾逸興橫素襟無時不招尋朱

門擁虎士列戟何森森剪鑿竹石開縈流漲清  
深登樓坐水閣吐論多英音片辭貴白壁一諾  
輕黃金謂我不愧君青鳥問丹心五色雲間鵲  
飛鳴天上來傳聞赦書至却放夜郎回暖氣變  
寒谷炎煙生死灰君登鳳池去忽棄賈生才桀  
犬尚吠堯凶奴笑千秋中夜四五嘆常爲大國  
憂旌旆夾兩山黃河當中流連鷄不得進飲馬  
空夷猶安得羿善射一箭落旄頭

江上贈竇長史

漢求季布魯朱家楚逐伍胥去章華萬里南遷  
夜郎國三年歸及長風沙聞道青雲貴公子錦  
帆遊戲西江水人疑天上坐樓船水淨霞明兩  
重綺相約相期何太深棹歌搖艇月中尋不同  
珠履三千客別欲論交一片心

贈漢陽輔錄事

鸚鵡洲橫漢陽渡水引寒煙沒江樹南浦登樓



不見君君今罷官在何處漢口雙魚白錦鱗令  
傳尺素報情人其中字數何多少祇是相思秋  
復春

經亂後將避地剡中畱贈崔宣城

雙鵝飛洛陽五馬渡江徼何意上東門胡雛更  
長嘯中原走豺虎烈火焚宗廟太白晝經天顏  
陽掩餘照王城皆蕩覆世路成奔峭四海望長  
安頰眉寡西笑蒼生疑落葉白骨空相吊連兵

似雪山破敵誰能料我垂北溟翼且學南山豹  
崔子賢主人歡娛每相召胡床紫玉笛却坐青  
雲叫楊花滿州城置酒同臨眺忽思剡溪去水  
石遠清妙雪書天地明風開胡山貌悶為洛生  
詠醉發吳越調赤霞動金光日足森海嶠

升菴云梁

虞騫詩落暉散長足細雨織斜文太白亦用其  
字然其驚人泣鬼則劉勰所謂自鑄偉辭前無

古人者乎獨散萬古意閑垂一溪釣猿近天上啼人

移月邊棹無以墨綬苦來求丹砂要華髮長折

腰將貽陶公誚

李詩選卷五

李詩選卷六

寄

安陸白兆山桃花崑寄劉侍御綰

雲卧三十年好閑復愛仙蓬壺雖冥絕鸞鶴心  
悠然歸來桃花崑得憇雲窗眠對嶺人共語飲  
潭猿相連時昇翠微上邈若羅浮巔兩岑抱東  
壑一嶂橫西天樹雜日易隱岬傾月難圓芳草  
換野色飛蘿搖春煙入遠構石室選幽開山田

獨此林下意杳無區中緣永辭霜臺客千載方  
來旋

淮南卧病書懷寄蜀中趙徵君

吳會一浮雲飄如遠行客功名莫從就歲光屢  
奔迫良圖俄棄捐衰疾乃綿劇古琴藏虛匣長  
劍挂空壁楚冠懷鍾儀越吟比莊舄國門遙天  
外鄉路遠山隔朝憶相如臺夜夢子雲宅旅情  
初結緝秋氣方寂歷風入松下清露出草間白

故人不可見幽夢誰與適寄書西飛鴻贈爾慰  
離析

春日獨坐寄鄭明府

驚麥青青遊子悲河堤弱柳鬱金枝長條一拂  
春風去盡日飄揚無定時我在河南別離久那  
堪坐此對牕牖情人道來竟不來何人共醉新  
豐酒

寄淮南故人

紅顏悲舊國青歲歇芳洲不待金門詔空持寶  
劍遊海雲迷驛道江月隱鄉樓復作淮南客因  
逢桂樹畱

沙丘城下寄杜甫

我來竟何事高卧沙丘城城邊有古樹日夕連  
秋聲魯酒不可醉齊歌空復情思君若汶水浩  
蕩寄南征

聞王昌齡左遷龍標遙有此寄

楊花落盡子規啼聞道龍標過五溪我寄愁心  
與明月隨風直到夜郎西

憶舊遊寄譙郡元參軍

憶昔洛陽董糟丘為余天津橋南造酒樓黃金  
白璧買歌笑一醉累月輕王侯海內賢豪青雲  
客就中與君心莫逆迴山轉海不作難傾情倒  
意無所惜我向淮南攀桂枝君畱洛北愁夢思  
不忍別還相隨相隨迢迢訪仙城三十六曲水

迴縈一溪初入千花明萬壑度盡松風聲銀鞍  
金絡倒平地漢東太守來相迎紫陽之真人邀  
我吹玉笙餐霞樓上動仙樂嘈然宛似鸞鳳鳴  
袖長管催欲輕舉漢中太守醉起舞手持錦袍  
覆我身我醉橫眠枕其股當筵意氣凌九霄星  
離雨散不終朝分飛楚關山水遙余既還山尋  
故巢君亦歸家渡渭橋君家嚴君勇貔虎作尹  
并州遏戎虜五月相呼度太行摧輪不道羊腸

苦行來北京歲月深感君貴義輕黃金瓊杯綺  
食青玉案使我醉飽無歸心時時出向城西曲  
晉祠流水如碧玉浮舟弄水簫鼓鳴微波龍鱗  
莎草綠興來携妓恣經過其若楊花似雪何紅  
粧欲醉宜斜日百尺清潭寫翠娥翠娥嬋娟初  
月輝美人更唱舞羅衣清風吹歌入空去歌曲  
自繞行雲飛此時行樂難再遇西遊因獻長楊  
賦北闕青雲不可期東山白首還歸去渭橋南

頭一遇君鄩堂之北又離羣問余別恨知多少  
落花春暮爭紛紛言亦不可盡情亦不可極呼  
兒長跪緘此辭寄君千里遙相憶

月夜江行寄崔員外宗之

飄飄江風起蕭颯海樹秋登艫美清夜挂席移  
輕舟月隨碧山轉水合青天流杳如星河上但  
覺雲林幽歸路方浩浩徂川去悠悠徒悲蕙草  
歇復聽菱歌愁岬曲迷後浦沙明瞰前洲懷君

不可見望遠增離憂

新林浦阻風寄友人

潮水定可信天風難與期清晨西北轉薄暮東  
南吹以此難挂席佳期益相思海月破圓景菰  
蔣生綠池昨日北湖梅開花已滿枝今朝東門  
柳夾道垂青絲歲初忽如此我來定幾時紛紛  
江上雪草草客中悲明發新林浦空吟謝朓詩

禪房懷友人岑倫

嬋娟羅浮月搖艷桂水雲美人竟獨往而我安  
能羣一朝語笑隔萬里懽情分沉吟綵霞沒夢  
寐羣芳歇歸鴻渡三湘遊子在百粵邊塵染衣  
劍白日彫華髮春風變楚關秋聲落吳山草木  
結愁緒風沙淒苦顏竭來已久頽思如循環  
飄飄限江裔想像空雷滯離憂每醉心別淚徒  
盈袂坐愁青天末出望黃雲救目極何悠悠梅  
花南嶺頭空長滅征鳥水濶無還舟寶劍終難

託金囊非易求歸來儻有問桂樹山之幽

廬山謠寄盧侍御虛舟

我本楚狂人鳳歌笑孔丘手持綠玉杖朝別黃  
鶴樓五嶽尋仙不辭遠一生好入名山遊廬山  
秀出南斗傍屏風九疊雲錦張影落明湖青黛  
光金闕前開二峯長銀河倒挂三石梁香爐瀑  
布遙相望迴崖沓嶂凌蒼蒼翠影紅霞映朝日  
鳥飛不到吳天長登高壯觀天地間大江茫茫

去不還黃雲萬里動風色白波九道流雪山好  
為廬山謠興因廬山發閑窺石鏡清我心謝公  
行處蒼苔沒久服還丹無世情琴心三疊道初  
成遙見仙人綵雲裏手把芙蓉朝玉京先期汗  
漫九垓上願接盧敖遊太清

寄王漢陽

南湖秋月白。玉宰夜相邀。錦帳郎官醉。羅衣舞  
女嬌。笛聲喧沔鄂。歌曲上雲霄。別後空愁我。相

思一水遙

春日歸山寄孟浩然

朱紱遺塵境。青山謁梵筵。金繩開覺路。寶筏度  
迷川。嶺樹攢飛拱。崑花覆谷泉。塔形標海月。樓  
勢出江煙。香氣三天下。鐘聲萬壑連。荷秋珠已  
滿。松密蓋初圓。鳥聚疑聞法。龍參若護禪。愧非  
流水韻。叨入伯牙絃。

江上寄元六林宗



霜落江始寒，楓葉綠未脫。客行悲清秋，永路苦不達。滄波眇川汜，白日隱天末。停棹依林巒，驚猿相叫聒。夜分河漢轉，起視溟漲濶。涼風何蕭蕭，流水鳴活活。浦沙淨如洗，海月明可掇。蘭交空懷思，瓊樹詎解渴。勗哉滄洲心，歲晚庶不奪。幽賞頗自得，興遠與誰豁。

涇溪東郡寄鄭少府諤

我遊東亭不見君，沙上行將白鷺群。白鷺行時

散飛去，又如雪點青山雲。欲往涇溪不辭遠，龍門颯波虎轉眼。杜鵑花開春已闌，歸向陵陽釣魚晚。

三山望金陵寄殷淑

三山懷謝朓，水澹望長安。蕪沒河陽縣，秋江正北看。盧龍霜氣冷，鳩鵲月光寒。耿耿憶瓊樹，天涯寄一歡。

畱別

秋日魯郡堯祠亭上宴別杜補闕范侍御  
我覺秋興逸誰云秋興悲山將落日去水與晴  
空宜魯酒白玉壺送行駐金羈歇鞍憇古木解  
帶挂橫枝歌鼓川上亭曲度神颿吹雲歸碧海  
夕鴈沒青天時相失各萬里茫然空爾思

別中都明府兄

吾兄詩酒繼陶君試宰中都天下聞東樓喜奉  
連枝會南陌愁為落葉分城隅潒水明秋日海

上青山隔暮雲取醉不辭畱夜月鴈行中斷惜  
離羣

夢遊天姥吟畱別

海客談瀛洲煙濤微茫信難求越人語天姥雲  
霓明滅或可覩天姥連天向天橫勢拔五嶽掩  
赤城天台四萬八千丈對此欲倒東南傾我欲  
因之夢吳越一夜飛度鏡湖月湖月照我影送  
我至剡溪謝公宿處今尚在潒水蕩漾清猿啼

脚着謝公屐身登青雲梯半壁見海日空中聞  
天雞千巖萬轉路不定迷花倚石忽已暝熊咆  
龍吟殷巖泉慄深林兮驚層巔雲青青兮欲雨  
水澹澹兮生煙列缺霹靂丘巒崩摧洞天石扇  
訇然中開青冥浩蕩不見底日月照耀金銀臺  
霓為衣兮風為馬雲之君兮紛紛而來下虎鼓  
瑟兮鸞回車仙之人兮列如麻忽魂悸以魄動  
恍驚起而長嗟惟覺時之枕席失向來之煙霞

世間行樂亦如此古來萬事東流水別君去兮  
何時還且放白鹿青崖間須行即騎訪名山安  
能摧眉折腰事權貴使我不得開心顏

金陵酒肆留別

風吹柳花滿店香吳姬壓酒喚客嘗金陵子弟  
來相送欲行不行各盡觴請君試問東流水別  
意與之誰短長

別東林寺僧

東林送客處月出白猿啼笑別廬山遠何煩過  
虎溪

黃鶴樓送孟浩然之廣陵

故人西辭黃鶴樓煙花三月下揚州孤帆遠影  
碧空盡唯見長江天際流

渡荆門送別

渡遠荆門外來從楚國遊山隨平野盡江入大  
荒流月下飛天鏡雲生結海樓仍連故鄉水萬

里送行舟

李詩選卷六

李詩選卷七

送

南陽送客

斗酒勿為薄寸心貴不忘坐惜故人去偏令遊  
子傷離顏怨芳草春思結垂楊揮手再三別臨  
岐空斷腸

送王屋山人魏萬還王屋

仙人東方生浩蕩弄雲海沛然乘天遊獨往失

所在魏侯繼大名本家聊攝城卷舒入元化跡  
與古賢并十三弄文史揮筆如振綺辯折田巴  
生心齊魯連子西涉清洛源頗驚人世喧采秀  
卧王屋因窺洞天門竭來遊嵩峰羽客何雙雙  
朝携月光子暮宿玉女窗鬼谷上窈窕龍潭下  
奔淥東浮汴河水訪我三千里逸興滿吳雲飄  
颻浙江汜揮手杭越間章亭望潮還濤卷海門  
石雲橫天際山白雪走素車雷奔駭心顏遙聞

會嵇美且度耶溪水萬壑與千巘崢嶸鏡湖裏  
秀色不可名清輝滿江城人遊月邊去舟在空  
中行此中久延佇入剡尋王許笑讀曹娥碑沉  
吟黃絹語天台連四明日入向國清五峯轉月  
色百里行松聲靈溪谷沿越華頂殊超忽石梁  
橫青天側足履半月眷然思永嘉不憚海路賒  
掛席歷海嶠迴瞻赤城霞赤城漸微沒孤嶼前  
嶢兀水續萬古流亭空千霜月縉雲川谷難石

門最可觀瀑布掛北斗莫窮此水端瀆壁洒素  
雪空濛生書寒却思惡溪去寧懼惡溪惡咆哮

七十灘水石相噴薄路創李北海巖開謝康樂

謝靈運與弟書云聞惡溪中九十九里有五十九灘王右軍遊此歎其奇絕遂書突星灘於

石松風和猿聲搜索連洞壑徑出梅花橋雙溪

納歸潮落帆金華岫赤松若可招沈約八詠樓

城西孤岩堯岩堯四荒外曠望群川會雲卷天

地開波連浙西大亂流新安口北指嚴光瀨釣

臺碧雲中邈與蒼嶺對稍稍來吳都徘徊上孤

蘇煙綿橫九疑漭蕩見五湖目極心更遠悲歌

但長吁迴繞楚江濱揮策揚子津身着日本裘

昂藏出風塵五月造我語知非佞人相逢樂

無限水石日在眼徒干五諸侯不致百金產吾

友揚子雲紛歌播清芬雖為江寧宰好與山公

羣乘興但一行且知我愛君君來幾何時仙臺

應有期東總綠玉樹定長三五枝至今天壇人

當笑爾歸遲我苦惜遠別茫然使心悲黃河若  
不斷白首長相思

送友人尋越中山水

聞道稽山去偏宜謝客才千巖泉灑落萬壑樹  
縈迴東海橫秦望西陵遠越臺湖清霜鏡曉濤  
白雪山來八月枚乘筆三吳張翰杯此中多逸  
興早晚向天台

魯郡堯祠送竇明府薄華還西京

朝策犁眉騶舉鞭力不堪強扶愁疾向何處角  
巾微服堯祠南長揚掃地不見日石門噴作金  
沙潭笑誇故人指絕境山光水色青於藍廟中  
徃徃來擊鼓堯本無心爾何苦門前長跪雙石  
人有女如花日歌舞銀鞍繡轂徃復迴簞林蹶  
石鳴風雷遠煙空翠時明滅白鷗歷亂長飛雪  
紅泥亭子赤闌干碧流環轉青錦湍深沉百尺  
洞海底那知不有蛟龍蟠君不見綠珠潭水流



東海綠珠紅粉沉光彩綠珠樓下花滿園今日  
曾無一枝在昨夜秋聲閭闔來洞庭水落騷人  
哀遂將三五少年輩登高遠望形神開生前一  
笑輕九鼎魏武何悲銅雀臺我歌白雲倚牕牖  
爾聞其聲但一手長風吹月度海來遙勸仙人  
一杯酒酒中樂酣宵向分舉觴酌堯堯可聞何  
不令臯繇擁篲橫八極直上青天揮浮雲高陽  
小飲真瑣瑣山公醕酌何如我竹林七子去道

賒蘭亭雄筆安足誇堯祠笑殺五湖水至今憔悴  
空荷花爾向西秦我東越暫向瀛洲訪金闕  
藍田太白若可期為余掃灑石上月

單父東樓秋夜送族弟沈之秦

爾從咸陽來問我何勞苦沐猴而冠不足言身  
騎土牛滯東魯沈弟欲行凝弟畱孤飛一鴈秦  
雲秋坐來黃葉落四五北斗已掛西城樓絲桐  
感人絃亦絕滿堂送君皆惜別卷簾見月清興

來疑是山陰夜中雪明日斗酒別惆悵清路塵  
遙望長安日不見長安人長安宮闕九天上此  
地曾經為近臣一朝復一朝髮白心不改屈原  
憔悴滯江潭亭伯流離放遼海折翮翻飛隨轉  
蓬聞絃虛墜下霜空聖朝久棄青雲士他日誰  
憐張長公

魯郡東石門送杜二甫

醉別復幾日登臨徧池臺何時石門路重有金

樽開秋波落泗水海色明徂徠飛蓬各自遠且  
盡手中杯

灞陵行送別

送君灞陵亭灞水流浩浩上有無花之古樹下  
有傷心之春草我向秦人問路岐云是王粲南  
登之古道古道連綿走西京紫闕落日浮雲生  
正當今夕斷腸處黃鸝愁絕不忍聽

送賀監歸四明應制

久辭榮祿遂初衣。曾向長生說息機。眞訣自從  
茅氏得。恩波應阻洞庭歸。瑤臺含霧星辰滿。仙  
嶠浮空島嶼微。借問欲栖珠樹鶴。何年却向帝  
城飛。

送羽林陶將軍

將軍出使擁樓船。江上旌旗拂紫煙。萬里橫戈  
探虎穴。三杯拔劍舞龍泉。莫道詞人無膽氣。臨  
行將贈繞朝鞭。

送陳劉二侍郎兼獨孤判官赴安西幕府  
安西幕府多材雄。喧喧唯道三數公。綉衣貂裘  
明積雪。飛書走檄如飄風。朝辭明主出紫宮。銀  
鞍送別金城空。天外飛霜下葱海。火旗雲馬生  
光彩。胡塞清塵幾日歸。漢家草綠遙相待。

送賀賓客歸越

鏡湖流水漾清波。狂客歸舟逸興多。山陰道士  
如相見。應寫黃庭換白鵝。

同王昌齡送族弟襄歸桂陽

爾家何在瀟湘川青莎白石長江邊  
昨夢江花照江國幾枝正發東  
牕前覺來欲往心悠然魂  
隨越鳥飛南天秦雲連山海相接  
桂湘作水橫煙不可涉送君此去  
令人愁風帆茫茫隔河洲春  
潭瓊草綠可折西寄長安明月樓

送外甥鄭濯從軍

六博爭雄好彩來金盤一擲萬人開  
丈夫賭命

報天子當斬胡頭衣錦迴

又

丈夫蛇矛出隴西彎弧拂箭白猿啼  
破胡必用龍韜策積甲應將熊耳齊

又

月蝕西方破敵時及瓜歸日未應遲  
斬胡血變黃河水梟首當懸白鵲旗

送祝八之江東賦得浣紗石

西施越溪女明艷光雲海未入吳王宮殿時浣  
紗古石今猶在桃李新開映古查菖蒲猶短出  
平沙昔時紅粉照流水今日青苔覆落花君去  
西秦適東越碧山青江幾超忽若到天涯思故  
人浣溪石上窺明月

金陵送張十一再遊東吳

張翰黃花句風流五百年誰人今繼作夫子世  
稱賢再動遊吳棹還浮入海船春光白門柳霞  
色赤城天去國難為別思歸各未旋空餘賈生  
淚相顧共悽然

送蕭三十一之魯中兼問稚子伯禽

六月南風吹白沙吳牛喘月氣成霞水國鬱蒸  
不可處時炎道遠無行車夫子如何涉江路雲  
帆孑孑金陵去高堂倚門望伯魚魯中正是趨  
庭處我家寄在沙丘傍三年不歸空斷腸君行  
既識伯禽子應駕小車騎白羊

送楊山人歸嵩山

我有萬古宅嵩陽玉女峯長留一片月挂在東  
溪松爾去掇仙草萑蒲花紫茸歲晚或相訪青  
天騎白龍

送殷叔三首

海水不可解連江夜為潮俄然浦嶼濶岸去酒  
船遙惜別耐取醉鳴榔且長謠天明爾當去應  
便有風飄

其二

白鷺洲前月天明送客迴青龍山後日早出海  
雲來流水無情去征帆逐吹開相看不忍別更  
進手中杯

其三

痛飲龍筇下燈青月復寒醉歌驚白鷺半夜起  
沙灘

送陸判官往琵琶峽

水國秋風夜殊非遠別時長安如夢裏何日是  
歸期

宣州謝朓樓餞別校書叔雲

棄我去者昨日之日不可留亂我心者今日之  
日多煩憂長風萬里送秋鴈對此可以酣高樓  
蓬萊文章建安骨中間小謝又清發俱懷逸興  
壯思飛欲上青天覽日月抽刀斷水水更流舉  
杯銷愁愁更愁人生在世不稱意明朝散髮弄

扁舟

杭州送裴大澤

西江天柱遠東越海門深去割辭親戀行憂報  
國心好風吹落日流水引長吟五月披裘者應  
知不取金

李詩選卷七

李詩選卷八

酬荅

訓字文少府見贈桃竹書筒

桃竹書筒綺繡文良工巧妙稱絕群  
靈心圓映三江月彩質疊成五色雲  
中藏寶訣峨眉眉去千里提携長憶君

訓張司馬贈墨

上黨碧松煙夷陵丹硃末蘭麝凝珍墨精光乃



堪掇黃頭奴子雙鴉鬟錦囊養之懷袖間云升菴

囊養之懷袖間養字最妙李廷珪藏墨訣云贈爾烏玉玦泉清硯須潔避暑懸葛囊臨風度梅

月今日贈余蘭亭去興來灑筆會稽山

答湖州迦葉司馬問白是何人

青蓮居士謫仙人酒肆藏名三十春湖州司馬

何須問金粟如來是後身

訓崔十五見招

爾有鳥跡書相招琴溪飲手跡尺素中如天落

雲錦批云曹子建詩譬海出明珠與此句法同又云大白五言如菖蒲花紫茸及登華不

注峯與此句皆奇崛異常讀罷向空笑疑君在我前長吟字

不滅懷袖且三年

遊宴

東魯門泛舟

日落沙明天倒開波搖石動水縈迴輕舟泛月

尋溪轉疑是山陰雪後來

携妓登梁王樓霞山孟氏桃園中

碧草已滿地。柳與梅爭春。謝公自有東山妓。金  
屏笑坐如花人。今日非昨日。明日還復來。白髮  
對綠酒。強歌心已摧。君不見梁王池上月。昔照  
梁王樽酒中。梁王已去。明月在黃鸝。愁醉啼春  
風。分明感激眼前事。莫惜醉卧桃園東。

侍從遊宿溫泉宮作

羽林十二將。羅列應星文。霜仗懸秋月。霓旌卷  
夜雲。巖更千戶肅。清樂九天聞。日出瞻佳氣。葱

葱繞聖君

陪侍郎叔遊洞庭醉後三首

今日竹林宴。我家賢侍郎。三杯容小阮。醉後發  
清狂。

其二

船上齊橈樂。湖心泛月歸。白鷗閑不去。爭拂酒  
筵飛。

其三

刻却君山好平鋪湘水流巴陵無限酒醉殺洞庭秋

陪族叔刑部侍郎曄及中書賈舍人至遊

洞庭五首

洞庭西望楚江分水盡南天不見雲日落長沙秋色遠不知何處弔湘君

其二

南湖秋水夜無煙耐可乘流直上天且就洞庭

賒月色將船買酒白雲邊

其三

洛陽才子謫湘川元禮同舟月下仙記得長安還欲笑不知何處是西天

其四

洞庭湖西秋月輝瀟湘江北早鴻飛醉客滿船歌白紵不知霜露入秋衣

其五

帝子瀟湘去不還。空餘秋草洞庭間。淡掃明湖  
開玉鏡。丹青畫出是君山。

批云可入樂府  
竹枝寧有此耶

### 登覽

蜀國多仙山。峨眉邈難匹。周流試登覽。絕怪安  
可息。青冥倚天開。彩錯疑畫出。冷然紫霞賞。果  
得錦囊術。雲間吟瓊簫。石上弄寶瑟。平生有微  
尚。歡笑自此畢。煙容如在顏。塵累忽相失。儻逢  
騎羊子。携手凌白日。

### 登新平樓

去國登茲樓。懷歸傷暮秋。天長落日遠。水淨寒  
波流。秦雲起嶺樹。胡鴈飛沙洲。蒼蒼幾萬里。目  
極令人愁。

### 李詩選卷八

李詩選卷九

行役

下途歸石門舊居

吳山高越水清握手無言傷別情將欲辭君挂  
帆去離魂不散煙郊樹此心鬱悵誰能論有愧  
叨承國士恩雲物共傾三月酒歲時同餞五侯  
門羨君素書常滿案含丹照白霞色爛余嘗學  
道窮冥筮夢中徃徃遊仙山何當脫屣謝時去

壺中別有日月天，俛仰人間易凋朽。鍾峯五色  
在軒牖，惜別愁窺玉女窗。歸來笑把洪崖手，隱  
居寺隱居山陶公鍊液樓。其間靈神閉氣，昔登  
攀恬然但覺心緒閒。數人不知幾甲子，昨夜猶  
帶冰霜顏。我離雖則歲物改，如今了然失所在。  
別君莫道不盡歡，懸知樂客遙相待。石門流水  
徧桃花，我亦曾到秦人家。不知何處得雞豕，就  
中仍見繁桑麻。脩然遠與世事閒，裝鸞駕鶴又  
復遠。何必長從七貴遊，勞生徒聚萬金產。挹君  
去，長相思。雲遊雨散從此辭，欲知悵別心易苦。  
向暮春風楊柳絲。

客中行

蘭陵美酒鬱金香，玉腕盛來琥珀光。但使主人  
能醉客，不知何處是他鄉。

太原早秋

歲落衆芳歇，時當大火流。霜威出塞早，雲色渡

河秋夢繞邊城月心飛故園樓思歸若汾水無日不悠悠

上三峽

巫山夾青天巴水流若茲巴水忽可盡青天無到時三朝上黃牛三暮行太遲三朝又三暮不覺鬢成絲古歌朝見黃牛暮見黃牛三朝三暮黃牛如故言上峽舟行之遲也

早發白帝城

朝辭白帝彩雲間千里江陵一日還兩岸猿聲

啼不盡輕舟已過萬重山

批云以江陵為還蓋授室于許氏後作也

秋下荆門

霜落荆門江樹空布帆無恙挂秋風此行不為鱸魚膾自愛名山入剡中批云此又辭荆門而入剡中之作

宿五松山下荀娼家

我宿五松下寂寥無所歡田家秋作苦鄰女夜春寒跪進彫胡飯月光明素盤令人慙漂母三謝不能餐

懷古

蘇臺覽古

舊苑荒臺楊柳新  
菱歌清唱不勝春  
只今唯有西江月  
曾照吳王宮裏人

陪宋中丞武昌夜飲懷古

清景南樓夜風流  
在武昌庾公愛秋月  
乘興坐胡床  
龍笛吟寒水  
天河落曉霜  
我心還不淺  
懷古醉餘觴

宿巫山下

昨夜巫山下猿聲  
夢裏長  
桃花飛綠水  
三月下瞿塘  
雨色風吹去  
南行拂楚王  
高丘懷宋玉  
訪古一霓裳

謝公亭

謝公離別處風景  
每生愁  
客散青天月  
山空碧水流  
池花春映日  
牕竹夜鳴秋  
今古一相接  
長歌懷舊遊



閑適

魯中都東樓醉起作

昨日東樓醉還應倒接籬阿誰扶上馬不省下樓時

夜泊牛渚懷古

牛渚西江夜青天無片雲登舟望秋月空憶謝將軍余亦能高詠斯人不可聞明朝挂帆席楓葉落紛紛

清溪半夜聞笛

羌笛梅花引吳溪隴水情寒山秋浦月腸斷玉關聲

李詩選卷九

李詩選卷十

感寓

擬古

青天何歷歷明星如白石黃姑與織女相去不  
盈尺銀漢無鵲橋非時將安適閨人理紈素遊  
子悲行役瓶冰知冬寒霜露欺遠客客似秋葉  
飛飄飄不言歸別後羅帶長愁寬去時衣乘月  
託宵夢因之寄金徽

又

高樓入青天下有白玉堂明月看欲墮當牕懸  
清光遙夜一美人羅衣沾秋霜含情弄柔瑟彈  
作陌上桑絃聲何激烈風卷遶飛梁行人皆躑  
躑棲鳥去迴翔但寫妾意苦莫辭此曲傷願逢  
同心者飛作紫鴛鴦

又

長繩難繫日自古共悲辛黃金高北斗不惜買

陽春石火無留光還如世上人即事已如夢後  
來我誰身提壺莫辭貧取酒會四鄰仙人殊悅  
惚未若醉中真

又

月色不可掃客愁不可道玉露生秋衣流螢飛  
百草日月終銷毀天地同枯槁蟪蛄啼青松安  
見此樹老金丹寧誤俗昧者難精討爾非千歲  
翁多恨去世早飲酒入玉壺藏身以為寶

又

涉江弄秋水。愛此荷花鮮。攀荷弄其珠。蕩漾不成圓。佳期綵雲重。欲贈隔遠天。相思無由見。悵望涼風前。

又

去去復去去。辭君還憶君。漢水既殊流。楚山亦此分。人生難稱意。豈得長為群。越燕喜海日。燕鴻思朔雲。別久容華晚。琅玕不能飯。日落知天

昏夢長。覺道遠。望夫登高山。化石竟不返。

題

勞勞亭

天下傷心處。勞勞送客亭。春風知別苦。不遣柳條青。

題江夏脩靜寺

我家北海宅。作寺南江濱。空庭無玉樹。高殿坐幽人。書帶雷青草。琴堂翠素塵。平生種桃李。寂

滅不成春

題浣溪館

吾憐浣溪好百尺照心明可謝新安水千尋見  
底清白沙留月色綠竹助秋聲却笑嚴湍上于  
今獨擅名

觀胡人吹笛

胡人吹玉笛一半是秦聲十月吳山曉梅花落  
敬亭愁聞出塞曲淚滿逐臣纓却望長安道空

懷戀主情

宣城見杜鵑花

蜀國會聞子規鳥宣城還見杜鵑花一叫一回  
腸一斷三春三月憶三巴

三五七言

秋風清秋月明落葉聚還散寒鴉棲復驚相思  
相見知何日此時此夜難為情

哀傷

哭宣城善釀紀叟

紀叟黃泉裏，還應釀老春。夜臺無曉日，沽酒與  
何人。  
升菴曰：予家古本作「夜臺無李白」，此句絕妙，不但齊一死生，又且雄視幽明矣。昧者改爲「夜臺無曉日」，夜臺自無曉日，又與下句何人字不相干甚矣。七俗不可醫也。

隆昌張氏  
剡梓家謹

李詩選卷十

終



